


АЛЕКСАНДР НЕКРАСОВ (ГАМСА)

ГӨРД САТИН ДӨРӨМ



Тыдди пунктана Жена пилы
став бурей сийоюн папсамыс —
авторсань


24.06.95в.

Секрасоф —

АЛЕКСАНДР НЕКРАСОВ (ГАМСА)

ГÖРД САТИН ДÖРÖМ

Висьтъяс



Сыктывкар
Коми книжной издательство
1995

84. 2 Рос-Коми

Н 48

ТОРД САТНН
ДОТӨМ

Издательство



Издательство

ISBN 5-7555-0545-4

© Некрасов (Гамса) А. И., 1995

© Коми книжной издательство, 1995



Гөрд сатин дөрөм

Шоныд, лунвыв төла мича гоҗся лунад миян, зонпоснилөн, медмуса местаыс — Эжва дорын. Сиктын жө партитчам-чукөртчам, а сэсся чань вөвъяс моз котөртам ю дорө, тресь-трась мынтөдчам дөрөм-гачысь да зілям медводдзаөн уськөдчывны-көтөдчыны, а сэсся нин, лягуша моз ыркыд ваас велалыштөм бөрын, шерөн моз резам пөсялөмвыывсьыс зэв

көдзыдөн кажитчысь ванас бөрын-джык воысь ёртъясөс. Тшөтшъяяс, повтөг, веськыда выліад уськөдчөны, асьтө на сунгыласны ваас, тайкө оз пөдтыны, а ичөтджыкъяс бокин, көтөдчөны, велалыштасны көдзыд дінас да вөлись матыстчасны. Сэки найөс рез көть эн — оз нин повны.

Талун миянлысь вильшасьөмнымөс торкис ас сиктса дядьö — сплавконтораса дежурной диспетчер Иван Болотов.

— Зонкаяс! Зонкаяс! Кайлөй ме дорө. Көсья мыйкө висътавны тиянлы... Телефон пыр меным юөртисны, — кыз гөлөснас чуксалис сійө миянөс.

Ме берег дорас медматын вөлі да медводдзаөн и котөрти сы дінө. Ёртъяс эз жө нюжмасьны, лыйыштісны ме бөрся кыр йылө. Иван дядь чөла виччысьыштіс чукөртчөмнымөс, мыйлакө чужөмыс блед, син доръясыс вазьөмаөсь, веськыд кийс тіралыштіс. Татшөм шайө-пайө воөмнас ми сійөс эг на и аддзылөй. Болотов кызөктыштіс да пөдөм, пыді гөлөсөн юөртис:

— Война, война өд заводитчис, дона-

яс... Талун нель час асылын фашистскöй Германия уськөдчöма миян Роч му вылө...— сэсся гөррдзасис лолыс мортлөн да сійö челядь моз бөрддзис.

Ме некор на эг аддзыв, кыдзи бөрдіс мужичöй морт. Иван дядьлөн синваыс нормөдіс и миянлысь сьөлөмъясны-мөс. Но бөрдыштöмыс сылөн эшкын ыджада кымөр торйысь зэрыштöма дыра и вöлі, öвтыштіс-чышкыштіс дөрөм соснас лысваөн моз көтасьöм син дорьяссö да юалис:

— Кодьяс тіян пиысь медся тэрыба вермасны котөртлыны Баба курьяөдз? Сэн талун Миш Ваньлөн бригада вöчö буксирлы көрөванкапур. Колö юөртны налы война заводитчөм йывсьыс. Мужичöйыс медым дзик пыр локтасны сиктö... Ставныс...

— Миш Ваньыс менам вежай, сідзкө, меным и котөртлыны,— шуи Болотов дядьлы.

Ёртьяс пиысь некод эз шу меным паныда кыв, некод эз вöзйысь ни.

— Котөртлы, сідзкө,— öвтыштіс кинас Болотов.

Кокьясöй муас муртса инмыштлө-

ны, котӧрта. Шонді юр весьтын. Ны-
лӧм синъясӧс сӧйӧ, сӧкыд лолавны.
Кажитчӧ, весиг берег пӧлӧн сулалысь
пуясыс — пипуяс, кыдзяс, козъяс —
лигышмунӧмаӧсь жар вӧснаыс. Лапъ-
ясныс, ув-вожъясныс люньгысьӧмны
увлань, быттӧ и найӧ кывлӧмаӧсь
шог юӧрсӧ да ас ногыс шогсьӧны
неминучасьыс.

Котӧртигӧн некымынысь джӧмдылі
вӧр туй пӧперегалысь пу вужъясӧ, но
доймӧм кывтӧг чеччыштлі кокъяс вы-
лӧ и котӧрти, котӧрти Эжва горув.

Со и Баба куръя. Мужичӧйяс чукӧ-
рӧн пукалісны кер чукӧр вылын, ку-
ритчисны. Кылісны серӧктышталӧмъ-
яс. Кодкӧ, тыдалӧ, кутшӧмкӧ теш-
кодътор висътавліс. Шойччысьяслы
мыш сайсянныс вои, да локтӧмӧс ве-
жай сӧмын сӧк казяліс, кор нин каш-
кигтыр юрӧн зургыси сылӧн рушкуӧ
да кок дінас лигышмуні, апалі жар
сынӧдсӧ ваысь лӧптӧм кельчи моз да
сӧмын и горӧді:

— Война заводитчӧма... Чукӧстны
ставнытӧ дзик пыр жӧ тшӧктіс Боло-
тов дядь.

Сплавщикъяс тшөктөм виччысьтөг чукөртисны да сувтөдалисны шойччан бипур дінас сулалысь пашкыр коз улө багыръяс, пилаяс, черъяс да тэрыб воськовъясөн мөдөдчисны гортланьыс, Керөс бөжө. Эз кыв шмонь, варовитөм.

Мөд асывнас Эжва дорса ичөт сикт колльөдіс дорйыны лютөй врагысь Рөдинаөс медбур, медвына мужичөйясөс: миянөс вывтї ёна радейтысь батьясөс да гырысьджык вокъяснымөс. Унаөн на пиысь колисны вевт улөдз вайөдтөм стрөйбаяс, помавтөм срубъяс, сөмын на панөм чери кыян пыжьяс, ытшкытөм видзьяс, а томъяслы медся сьөлөмө сатшкысянаыс, жальыс,— сөмын на гөрддзасьөм муслун, кодөс өти здукөн орөдіс война. Пөшти быд керкаын нывбаба ки вылө колисны малямущ кодь посни челядь.

Менам вежай сөмын тулыснас на и гөтрасис. Весиг кага бөрдысьыс на керкаас эз вөв. Зэв ёна радейтис челядьтө. Ме вөлі налөн быд лунъя гөстьөн. Көть весиг и гортө оз лэдз: узь, шуө, миянын. Челядьнас пө керкаас сынөдыс чөскыдджык...

Фронт вылө медводдза мунысьяс лыдын вöлі и вежай. Мунан лунас сійö топыда кутліс менö да козьналіс дөрөм вылө гөрд сатин.

— Вурөд Сень Ёгор дед ордын да новлы, казьтывлы менö, вежапи, быд пасьталіг казьтышт... А ме тэ йылысь винтовка зарадитігөн кута казьтыштын, патронъяс пищальö сюялігөн, и мөда фашистлы тэсянь поклон ыстыны. Тадзи и кутам кыкөн тышкасьны.

Мекөд тшөтшъяяслы сэки вöлі сизим-көкъямыс арөс. Миян сэки чайтсьывліс, мый тайö пез фашистыс чужан муö, Комиö, дзик нин матөдз локтöма, Эжвалөн мөд чукыль саяс, көні вежайяс пуръясисны. Чайтсис, көнкө сикт сайын и кутас вежай воуйтны. Но война заводитчөм бөрын дыр мысти гөгөрвоим, мый зэв ыджыд вөлöма миян чужанінным, Рөдинаным, Керөс бөж сиктсаянь вир кисьтана косыс вывті ылын муніс.

Быд лун Эжва кузя горув, шулісны Кардорлань, кывтісны кык судта пароходъяс. Быд лун найö нуисны сөкөл кодь зонъясөс война вылө. Пароходъ-

яс берегö эз сувтлывлыны — миян ичöт сиктысь некодöс нин вöлі босьтнысö. Но Эжва бердса сиктъясын, тыдалö, вöлöма на мужикуловыс. Рöдина дорйыны мунысьясөн пароходыс пыр вöлі тыр.

— Чегъялöй öдйöджык бордъяссö фашистъяслысь да бөр воёй Победа-öн! — кылісны бабаяслөн, нывъяслөн да челядьлөн горзёмъяс тшöтш и миян сиктсянь. Воча кыв пыдди пароход вывсянь юргис «Идет война народная, священная война» да йöзсö ышöдана мукöд сыланкыв.

Войналөн медводдза лунъяснас фронт вылö колльöдiм чужан сиктысь став мужикуловсö, бөрнас быдмыштöм зонъясöс, кодъяскöд весиг öтлаын купайтчывлiм, а бөр воысьыс сiдзи некод эз и вöв. Ми ёртъяскöд быд лун виччысим батьяссиянь, вокьяссиянь, а ме нöшта и вежайсянь, письмöяс, катысь быд пароход дiнö котралiм Эжва дорö.

Öтчыд эзысь гөлöснас чукöстчис ю чукыльсянь еджыд юсь кодь «Волжин» пароход. Сiйö сьöкыда пушкис

да ньӧжйӧник матыстчис береглань. Сідзкӧ, эм пошта либӧ чеччысь. Радлам. Нывбаба-матрос зібйӧн чеччыштіс берөгӧ да пелька домыштіс пароходсӧ кыркӧтшса сюръяӧ.

«Гашкӧ, пызь вайисны?» — шуис кодкӧ йӧз чукӧрын сулалысьяс пиысь. Ӧд пароходъяс сувтісны миянӧ сӧмын сэк, кор вайлісны почта, кутшӧмкӧ тӧвар либӧ вӧлісны чеччысьяс пуксьысьяс. Матросъяс лэдзисны тшупӧдъяса пӧв пос. Дзор юра нин капитан матросъяслы сетіс кутшӧмкӧ индӧдъяс.

Сиктса почтальон, ки пӧла Пань, чепӧсйис лэдзӧм послань:

— Почта, миянлы эм письмӧяс?

— Почта талун абу,— вочавидзис пароход вывсянь кокардаа шапкаа дядьӧ, гашкӧ, ачыс капитаныслы отсасысьыс.— И груз абу... Кежыштӧй трап дінсьыс, эн мешайтчӧй...

Ставӧн, кодъяс сулалісны берег вылын, ланьтісны. Сӧнӧда кык нывбаба-матрос кутісны петны нӧсилкаӧн. А нӧсилка вылас куйліс руд шынеля морт. На бӧрся поскӧд лэччис нэри-

ник, коснѳд том нывбаба, быттьѳ
нывка на... Челядь кежисны бокѳ,
сетісны туйсѳ пароход вылысь петысь-
яслы. Нѳсилка вылын куйлысь морт-
лѳн чужѳмыс вѳлі лым кодъ еджыд.
Сійѳ ньѳжйѳник вѳрѳдіс вом доръяссѳ
да кодѳскѳ корсис синъяснас. Кѳсйис
висьтавны мыйкѳ, но шунысѳ немтор
эз вермы. Небыдик тѳвру летіс салдат-
лысь дзормыштѳм нин юрсисѳ. Нѳ-
силкасѳ зѳв видзчысьѳмѳн пуктісны
эжа вылѳ. Пароход вылысь бѳръя
лѳччысьыс синмаліс йѳз чукѳрсѳ,
шлюп-шлюпкерис нырнас, синваыс пе-
тіс, чышкыштіс соснас да шуис:

— Мен тшѳктісны... фельдшер ме...
госпитальысь колльѳдны тайѳс гор-
тас... И мѳдѳс на... Эжва йылѳ... Сійѳ
дзик коктѳм... Босьтѳй документъяс-
сѳ. Ме бѳр пароходас...

Вайѳдѳм мортыс вѳлі миян сиктысь
Петрик Коль. Снаряд торпыригъясѳн
сылысь став морѳс лыяссѳ чегъялѳма-
шамѳма. Вундалѳмаѳсь унаысь морѳс-
сѳ, бурдыштлиѳма, но локтігас бѳр
восьѳма дойыс.

Петрик Коль вѳлі фронт вылысь

медводдза локтысьыс. И өдва ловъя, а войнаөдз сійö нимавлöма районын медбур трактористöн. Регыд мортыд и оліс...

Вежайсянь меным война чöжөн сöмын куим письмö и воліс.

Со медбөръяыс, кодöс пыр на видза: «Ми, комияс и рочьяс, украинасяяс и армяниньяс, грузиньяс и белорусьяс, дорьям виж чумаысь Москва — миян Рöдиналысь сьölöмсö. Тöрыт враг сизимысь уськөдчывліс миян позицияс вылö, но ми эг сетчöй, бөр вöтлім фашистьясöс. Мекөд öти ротанын вöлі земляк Иван Кузьпелев, но тöрытья чорыд бойын пöгибнитіс сійö. Но ми эскам, мый Победа лоас миян сайын, врагöс лоö жугөдöма...»

Письмөсö помалöма татшöм кывьясөн: «Сашук, бура велөдчы, ичöтысянь радейт удж. Тіян, тіян, быдысь войтырлы, ковмас вöчны сійöс, мый ми эгö удитöй войнаөдз...»

Вежайлөн козинысь Сень Ёгор вурис меным гөрд сатин дөрөм. Дөрөмсö пасьтавлывлі ыджыд празникьясö,

и быд пасьталіг син водзö сувтліс вежайöй.

Школаö ветлігөн ми быдпöрйö пыравлім сплавконторалөн релейкаса дежурнöйлөн жырйö. Öд выльторъяссö ми медводз Болотовлысь кывлім. Куим-нель вонад быдмим-тöлксялім, радио пыр нин бур юөръяссö виччысям.

Öтчыд вöлі май 9 лун. Болотов дядь петіс аслас радиостанция жырсьыс да миянöс аддзытöг на кутіс этшсьыс петмөн горзыны:

— Война кусіс! Победа! Победа, зарнияс! Победа! Контора вылö колö лэптыны гöрд флаг. Но флагыс ставыс ротмунöма, а выльсö вурны гöрд сатиныс контораын абу. А флаг кө öшöдам, йöзыс öдйö тöдмаласны, мый талун праздник — Победа лун. Ме важөн сиктса войтырлы шулі, мый Победа йылысь юөр — контора вылын дöлалысь гöрд флаг.

— Менам, Болотов дядь, эм гöрд сатин дөрöм, пöшти вылькодь на, но меным оз нин төр. Часлы, котöртла гортö да пöчлы тшöкта дөрöмсьыс

вурны флаг,— радлігтырйи висьталі дежурнойлы.

Менсьым мөвпөс Болотов дядь ошкис. Котөрті гортө, ышка-пошка, радлун вөсна кылөй омөля артмө.

— Мый нө, пиук, сэтшөмыс лоис, вом тырыд нюм? — юалис пөч.

— Война кусіс, талун Победа лун!

— Мый тэ шуин, шөвктугйөй?

— Война кусіс. Победа!

Пөч водзө эз кут юасьны, топөдіс менө морөс бердас да мыйкө шуалис вомгорулас. Чужөм кузьтаыс визувтис синва. Синваыс тотшкис юр вылө.

Кор неуна көдзальштис пөч, кори ме сійө гөрд дөрөмысь вурны флаг. Зіля пызан вылө вайис зингеровскөй машинасө да кутчысис уджө.

— На, сө зөлөтаөй, гөтов флагыд, босьт... А сосьяссө идравла на, коркө, гашкө, кытчөкө и ковмас...

Флагсө суйи таг зіб помө да котөрөн муні конторалань. Дежурнойлөн дасьтөма нин вөлі вевт вылө кайны пос. Пөрысь морт сетіс көрт тувъяс, мөлөт да тшөктіс:

— Вевтыслөн өккупеньыс ён, сэтчө и варт көрт тувъяснас.

Ме ур моз кайи сарай вылө и тувъялі флагсө, сувті флагыскөд орччөн да ёсь гөлөсөн горөді:

— Победа! Победа! Гитлерлы капут!

Флаг кыпыда шпоргис, быттьө асногыс юкис радлунсө миянкөд.

Война кусөм бөрын вежай гөтырлы воис военкоматсянь юөр, кытчө гижөма: «Исаков Иван Михайлович пропал без вести под Москвой, защищая честь и независимость нашей социалистической Родины».

Эз этша синва кысът вежай гөтыр война кадө, кузь синваөн бөрдіс и тайө юөр бөрас, больничаөдз воліс.

— Дугды, Клавдия, асьтө вины. Гашкө, и ловъя на Иванушкоыд. Он али мый помнит, Ласей Мишлы пөминанньө вөчлім, а мортыд ловъя вөлөма. Со өні пу кокнас сикт кузя тотшьялө,— бурөдіс сійөс Ольга тьöt.

Ме сеті кыв: быдма, верстьө лоа да кута корсьны вежайөс.

Колис кад. Помалім ёртъяскөд шөр школа, а сэсся пединститут. Мөдө-

дісны велодны челядьос чужан сиктö. Котырті удж школаас следопыть-яскöд, кутім чукöртны материал миян землякъяс йылысь, кодъяс пöгибнитісны Великой Отчественной война вылын.

Öні сиктын, сельсöвет дорын, сулалö памятник налы, кодъяс дорйисны Рöдина, вайисны Победа. Зарни шыпасъясön гижöма ним-овсö Петрик Кольлысь и Миш Ваньлысь, и уна мукöд усьöм мортлысь.

Миян следопытьяслы отсалісны тöдмавны Подмосковной школаса пионеръяс и вежай олöмысь медбөръя лист бокъяссö:

«Исаков Иван Михайлович, защищая столицу нашей Родины в составе Панфиловской дивизии, в неравном бою с фашистами был тяжело ранен. Когда бойцы отражали следующий танковый удар противника, И. М. Исакова не было уже в рядах стрелковой роты. Старый колхозник Матвеев обнаружил тело солдата на лесной поляне и похоронил его там», — гижисны сэтчöс пионеръяс.

Татшөм юөр воём бөрас регыд ми вежай гөтыркөд петім туйө — мөдөд-чим казгыштны югыд паметьсө вежайлысь.

Вот и вежайлөн гу. Гу вылас пуктім мича дзоридзьяс да венук. А венукас көрталім гөрд сатин ленточкаяс. Ленточкаяссө вундалім гөрд сатин дөрөм соскысь...

Йөнөд йөрын

Миян колхозлөн унджык көдза муыс вөлі сикт гөгөрын. Но ыджыдкодь му овмөс вөдитіс Йөнөдын, грездянь верст вит сайын. Йөнөд йөрсө вой төлысь видзис козья вөр. Сы вөсна му вылас колхоз пырджык көдзліс рудзөг да босьтліс озыр урожай.

Йөрсө видзны-дөзьөритны скөтөн травитөмысь да йөзөн таргайтөмысь колхоз правление индіс Ёгорөс — кузиник тушаа, кельыдлөз синъяса, пась-

кыд тошка пöльöс. Ар кежлас сійö лöсьöдiс лыскысь чом, пытшкöсас вольсалис кос турун. Августын, кор колхозникъяс босътчисны идравны сюсö, сійö сэни и узьлис.

Ме важöнкодъ нин вöзйыси пöльлы:
— Босътлы, пöльö, аскöдыд войко-
лавны.

И со öтчыд сійö шуис меным:

— Толик, талун пажын бöрын вет-
лам Йöнöдö. Буждöм шор дорын öмидз
ёна артмöма. Рытöдзыс тэа-меа öк-
тыштам чöскыд вотöссö, войнас узям
чомйын, а асывводзнас лэччылам Ба-
ба куръяö сын вугравны.

Со ми и Йöнöдынöсь. Пöлькөд гө-
гöртiм йöрсö, а сэсся öктiм öмидз. Ок
и уна да гырысь тусыс. Дозъяс ты-
рисны, бергöдчим чом дорö, пестiм
бипур. Пöль пуис тшакысь сорва да
сійöн нуръясьыштiм.

— Тэ, пиук, пыр чомйö да вод. Аски
öд водз ковмас чеччыны, чериыд оз
радейт дыр узьысьтö,— шуис сійö
меным.

Пемдiс. Пуксис лöнь рыт. Петiс
эзысь тöлысь да лыддыны кутiс

енэжсьыс кодзувъяс. Ёгор дед коскас суйис чер да муніс чом дорысь. А менюжөдчи чөскыд көра турун вылө да вугырті. Но менсьым вугралөмөс регыд торкис сёрни.

— Мыйла нө рудзөг кольтаяссө гусялін, Матрена? Явита да пуксьодасны Човйö. Он мөй помнит, кыдзи ведра шепысь судитісны Педөр Настаөс?

— Криста ради, челядь вöсна жали тышт, бур мортöй. Талун ветлі правлениеö да предлысь кори авансөн пудсю. Челядь, мися, тшыгъялöны, а ыджыдджык пийö, Николаюшко, садьсö нин гоз-мөдысь воштыліс. Но эсет предыд сютö,— нор кывъясөн корис Матрена.— Да и верöссиянь некутшөм юөр абу коймөд төлысь. Гашкө, фашист пуля улö веськаліс. Ойя да ойя, кор бара тайö сир курыд олөмыс помасяс.

— Грекө эськө вöйтан да. Босьт да ну куим кольта. Ме тэнö эг аддзыв и тэ менö эн жö,— шуис пöль.

И друг, быттьö гыма съөд кымөр, виччысьтөг воис колхозса председа-

тель Кырнышев Педь да кыз гөлөснас кутіс мый вынсьыс матькыны.

— Сё лешак, тадзи тэ видзан йөртө! Сю кольтаястө гусявлөны, а тэ шыр куталан али мый чумалияс увсьыс? — уськөдчис сійө пөль вылө.

— Ме, ме сөмын на гөгөрти йөрсө. Дзик некод эз вөв,— шуис Ёгор пөль.

— Тэ, Матрен, гусялін колхозной нянь, вөчин преступление. Ковмас закон серти кыв кутны. Öнi жö нуода правлениеö да сдайта милиционерлы,— горзіс председатель. Сэссия лэччис вөв вывсьыс, кватитіс нывбабаөс шошаөдыс да кутіс пыркөдны.

— Лэдз пикө воөм мортсө, сьылі вундан гаг. Ачыд кодалан-юан, дө-ваяскөд кыскасян да таргайтан колхозной няньсө да эмбурсө. Матрен пөгибө воөм морт. Ыджыдджык пиыс тшыгысла регыд кулө, верөсыс фронт вылын вир кисьтө. Ог сет ме тэныд нывбабасө өбидаө, он лысьт судитны салдаткаөс. Он кө эновтчы, юртө чинта. Меным воштыны немтор,— пузис Ёгор пөль да лэптис Кырнышев юр-весьтө черсө. Менө, сэтшөма кө колө,


накажит, а Матренлы авансөн көть пуд рудзөг сет.

Повзьомысла пред паляліс да пинь пырыс шуис:

— Мед сідзкө, тэ ногөн лоө, Ёгор Матвеевич.

Война кадö быдлаын олісны сьöкыда. Кок йылысь пöрöдан удж, лёкиник сёян, висьöмъяс турунöс моз ытшкисны тылын уджалысь пöрысь йöзöс, нывбабаясöс, челядьöс. Нöшта сьöкыджык вöлі овны йöзлы сэні, көні колхозса председательөн, райкомъясса секретарьясөн, сельсöветъясса юралысьясөн вöліны Кырнышев кодь сьöлөмтөм войтыр.

Хромка

 қоласа директор чукөртіс велөдчысьясös линейка вылө да шуис: «Тіянкөд, дона челядь, кутас сёрнитны уджвывса ветеран Серафим Васильевич Матвеев».

Серафим Васильевич линейка вылас локтöма гудöкөн. Сёрнисö пантöдз босътчис ворсны «Идет война народная» сьыланкыв. Уна зонкалөн да нывкалөн вөрзис сьөлöмыс. Кор ветеран помаліс ворсöмсö, шыасис челядь дорö:

— Тайö сьыланкывсö батьöй ворсіс Великой Отчественной война вылö мунигас, а сэсся гудöксö козьналіс меным да тшöктіс видзны сійöс синмös моз. Гашкö, батылөн сьөлöмыс сэки кылöма, мый ловйөн оз бергöдчы гортö. Сійö пöгибнитіс Ленинград дорйигөн.

Ме война кадас муни велöдчыны Красной Затонö, көсийи лоны пароходывса механикөн. Сьöрысь босьті хромка. Ті, челядь, война кадтö тöданныд сöмын книгаяс да кинофильмъяс серти. Тані, Коми муын, эз гымгыны да потласьны снарядыяс, бомбаяс, но йöз олісны зэв сьökыда. Кок йылысь пöрöдан удж, лёкиник сёян-юан, висьöмъяс, турунös моз ытшкисны нывбабаясöс, челядьöс да пöрысьясöс. Ме, Затонын велöдчигөн,

вошти нянь вылө карточкаос да сьомос. А карточкатогыд няньто он босыт. Куті тшыгъявны, сөйтөмла бергөдчис юрөй. Кык лун эг ветлы велөдчыны. Локтис общежитиео мян группаса воспитатель да шуо меным: тэ пө, Матвеев, бура гудөкасян. Затонса нывбабаяс март көкъямысөд лун кежлө дасьтоны концерт, а гудөкасысыс абу. Тэнө пө, Серафим, короны ворсны.

Сэки и ме висыталі воспитательлы ассым курыг шогос. А сийө юөртөма Затонса аньяслы. Сьөлөма бабаяс мездисны менө тшыгла кулөмысь.

Төрыт пошта вылысь босыті пенсия да гортө локтигөн кытчөкө уськөдсьөма. Шогө вои. Мөвпала: бара ковмас тшыгъявны война кадад моз. Но рытланьыс мянө пырис Витя Пипуныров да мыччис воштөмторйос. Зэв өдйө бөр петис. Муртса удиті аттьө шуны. Школаса директорыд талун чукөртис сы вөсна, медем Витялөн бур вөчөм йылысь төдіс став школа.

Тайө сөрни бөрас Матвеев корис ас

дорас Пипуныровөс, пөся кутліс сійөс да шуис:

— Ме пөрысь нин, гашкө, регыд муна таладор югыдсьыс. Тэныд, муса пи, козьнала батылысь гудөксө. Кутан волывлыны миянө, велөда тэнө гудөкасьны.

Мамлы козин

Педөсей Вань Ольга гөтырыскөд мунисны видз вылө. Челядьсө, дас кык арөса Машаөс да көкъямыс арөса Мишаөс, колисны горт овны. Дерт, челядь вөзйысисны, но мамыс өлөдіс:

— Тіянлы уджыс гортын тырмымөн. Ковмас ыжъяс бөрся видзөдны, порсьпиянөс вердны, тасьті-пань мыськыны, джодж чышкыны, рытнас Сюрукөс вайөдны.

Челядь ас кадө вөчисны став уджсө. Лун шөр бөрын весиг купайтчыны Эжва дорө лэччылісны. Но со кутіс

төвзъысьны, өшинювса льом мөдіс
нюклясьны. Эжва гызис и гызис. Ка-
ляяс челядь моз горзісны, радлісны,
мый матысмө зэр. Регыд мысти и зэр-
мис, а сэсса ведра дорысь моз кутіс
киссьыны.

— Кыздз бара татшөм гыа дырйи
ичөтик пыжнас бать-мам вуджасны?
Гашкө, асылөдз төлыс оз лөнь,— май-
шасис Маша. Мөсным лысьтытөм. А
сійөс лысьтытөг оз позь кольны асы-
лөдз, вөраыс пыктас. Ме некор на эг
лысьтыв Сюрукөс, но мамуккөд частө
лэччывлі картаө да бура төда, кызди
тайө вөчсьө.

— Сідзкө, Машук, тэ лысьты, а ме
отсасьны кута,—ышөдіс чойсө Миша.

Маша ставсө вөчис сідз, кызди вөчлө
мамыс: пөдөнчаө кисьтіс шоныд ва,
мөс нёнъясөс чышкавны босьтіс сөстөм
дөра, юрас гартыштіс мамыслысь
чышьянсө, сетіс мөслы турун. Сюрук
сулаліс чөла. Сылөн нёнъясыс вөліны
зэлыдөсь, и Машалы некымынысь ков-
мис шойччөдны чуньяссө. Но со лысь-
тыссис. Йөвсө сысьялісны да лэччө-
дісны көзөдө.

Сэссия чоя-вока ужнайтісны да водісны узыны.

Машаёс садьмөдіс мамыслөн шөпкөдчөмыс:

— Зарни ныв быдмө миян, Иванушко. Став уджсө вөчөмаось вокыскөд, весигтө Сюрүкөс лысьтөмаось.

Омөль

Эна чөсмөдлө сиктса войтырөс Эжва мөдлапөвса ты, кодөс шуоны Лөз вадйөн. Сөмын абу век сійө лышкыд. Мукөддырйи пумөн оз шед чериыд. Коркө пө, ёна важөннин, кор Степан Пермскөй Гамса войтырөс локтөма христианаө пыртны, ты бокса пожөма ягас ловъявывсьыс ыргөн кудйө дзебсьөма Зарни Ань, коді абу көсйөма лоны Исус Христосөс вера пыдди пуктысьөн.

Ичөтсянь менө бать велөдліс черикыйны тывйөн и ветельён, ботанён и вугырөн. Черитөгьд эг овлөй төв ни

гожөм, тулыс ни ар. Босътлывліс менө и Лөз вадйө. Паметын тайө ты вылын медводдзаысь ветлөм. Лөнь гожся рыт. Выя бордъяснас шонді мавтіс енэжтассө да сэсса дзебсис вөр сайө. Бать да вежай чөвтисны тыө ыджыд тыв. Гез пом сетісны меным, а асьныс кытшовтісны пыжнас ва кузя. Чайті, мый тырыс чериыс лоас, а дзик нинөм эз вөв. Чөвтисны мөд төня, коймөдөс, но васө гудралөм сөмын лоис.

— Талун Зарни Аньыд мыйлакө дөзмөма, оз сет черитө. Колө тшынас вөчны, — шуис вежай.

Бать перйис сямөд, чегъяліс понөль росъяс да пестіс неыджыд бипур. Уль понөль росъяс трачкакылісны, йөв кодь еджыд тшын разаліс пожөма яглань. Бать да вежай кутісны бипурсө вомөнавлыны өтарө-мөдарө да шуавны:

— Мый тшынан?

— Вомидз.

— Лөк войтырысь, лөк йөзысь. Тшын йылө, би йылө лөк вөчысьлөн думъясыс. Зарни Ань, Лөз вад дорса сар, сет миянлы гырысь и посни чери,

медым пестеръяслы тырны да не төрны.

Тшынасьом бөрын вадйыд чериалис миянөс. Одва лыбис кыйдөсыс да тывным вит мегыра пыжө.

И со кывтам Эжва кузя гортлань. Вежай сынө, а бать бөжалө. Ме пыж шөрас пукала да вуграла.

— Мишө, Мишө, видзөдлы, мый нө тайө? Омөлыс али мый кузь юрсисө сыналө Присада лыа бөж йылас,— кылі бательсы гөлөссө да өдйө палялі вугралөмысь. Вежай дугдіс сынөм-сыс, и ставөн кутім дзоргыны лыа бөжлань. Чуймөданторйыслөн мыгөрыс вөлі мортлөн кодь, кузь съод юрсиыс лэччөма ва веркөсөдзыс. Гашкө, збыль Омөлыс?

— Омөлыс и эм. Купайтчөма шонді петөм бөрас да юрсисө сыналө,— эскөдіс вежай да босьтіс пищальсө.— Кольөм во Ольош Ивө тайө местаас вөлөм кыснанасьө да пыж увтіыс уйөма Омөлыд, төкөтьө абу путкыльтөма. Часлы, ме сылы кымөсас пезьдөда өтка пуляөн...

Пыжным матыстчö и матыстчö «ва-
салань».

— Лыя, нинöм сэсся виччысьны, а
то Омöльыс казялас миянös да сунас
Эжваас,— шуис вежай.

— Энлы, энлы,— вочавидзис бать.

— Да тайö жö мös видзысь Öгаш
кузь юрсисö сыналö,— тöдi ме.

Недыр мысти Öгаш казялис миянös,
öдйö кайис берегö да вошис бадьяс
сайö. Вежай да бать сюся видзöдлисны
öта-мöд вылас да нюммунисны.

— Вот тэныд и Омöль, тököтьö Öга-
шös эг лый,— шуис вежай.

Выйов

лег Маслов таво лоис велöд-
чысьөн. Сийö мунис школаö.
Первой классаяс радпырысь
висьталисны велöдысьлы ним-овсö. Со
и Олегöдз воис öчередьыс.

— Рочөн али комиён висьтавны
овös,— юалис учительлысь зонка.

— Висьтав комион,— тшөктіс учитель.

— Выйов,— збоя шуис Маслов.

Велөдчысьяс нюммунисны, а Коля Балин, сылөн ёртыс, гораа серөктіс. Учитель нюммунис жө, но шуис:

— Молодеч Олегыд, ассьыс овсө комион и рочөн төдө. Но документас овыс Маслов и ми кутам шуны сійөс сідз.

Олеглы мамыс тшөктіс:

— Костюмтө бура видз, эн няйтөсьт. Оні ставыс зэв дона да форматө ковмас во-мөд новлыны.

Но школаысь гортас мунигөн Олег вунөдіс мамыслысь тшөктөмсө. Зэрөм бөрын шорө корабликъяс лэдзалис. Гортас нин казалис: костюм гачыс ёна няйтөссьөма. Пырис керкаө, пөрччысис да гачсө дзебис койка улө. Сөйыштіс да кайис паччөрө. Олеглөн мамыс сөрөнкодь нин воис куканьяс дорысь. Пиыс узьө нин вөлі. Қор кутіс мыськыны джодж, койка улысь адзис пиыслысь няйт гачсө. Скөрмыштіс аныд, но дона писө эз садьмөд, шонтіс ва да мыськаліс гачсө.

Аски кежлө гачыд эз косьмы и Олеглы ковмис школао мунтөг овны.

Мөд луннас учительыс, Иван Константинович, юалис Олеглысь:

— Көсья төдны, мыйла төрыт Маслов эз вөв школаын?

— Ме, ме... школаысь мунігөн няйтөсьті гачөс, мамө мыськаліс сійөс, да эз косьмы,— мыжа морт моз висьталіс зон.

— Водзө вылө колө лоны өкуратнөйджыкөн, Маслов,— вөчис кывкөртөд учитель.

Колис кад. Вөлі сентябрь пом. Олеглөн школао мунан туйыс чукультіс керка дорті, көні оліс Иван Константинович. Зонлы син улас шыбитчис: учительлөн съод ной гачыс косьмө-өшалө керка стен бердын.

«Учительлөн төрыт гачыс няйтөсьсьөма да мыськалөма. Абу на косьмөма. Сідзкө, миянөс талун оз велөд»,— мөвпыштіс Олег да бөр муніс гортас.


Мөд луннас учитель юалөм вылө Олег Маслов вочавидзис:

— Иван Константинович, тіян гачныд өшаліс керка стен бердад. Ме

чайті, мый школао он мунёй. Ме, ме...
честноя шуа, век сэсса кута волыны
школао.

И колё шуны, мый сюсь да вежора
Маслов та бёрын пыр волывліс школао
и лоис медбур велёдчысьяс лыдын.

Звезда

 рокъяс бёрын Миша быд рыт
отсасис батыслы, коді уджа-
ліс конюкөн. Зонка ёна радей-
тіс вёвъясös, но медъёна сылы сёлём
вылас воис Звезда нима рыжой чань.
Сылён кымöсын вöлі ки пыдös пасьта
еджыд кытш, дзик быттьö кодзув. Сы
вöсна, буракö, и нимтöмаöсь Звездаөн.

Вöлі сентябрь пом. Талун батыс
кöсйис ветлыны сельпоö.

— Тэ, пиук, час мысти вёвъястö
юктав. Абу öд первойысь нин,— шуис
батыс.

Ичöтик конюк лэдзис вёвъясös не-
ыджыд ты дорö, кодös кытшаліс по-
тшös.

Чань да мамыс торйөдчисны мукөд
вөвъясысь да веськөдчисны ты ка-
тыдпомө. Звезда ичөт кага моз виль-
шасис мамыс дорын: чеччыштліс да
котөртиштліс. Сійө төдлытөг воис
вутшкаинө. Кокъясыс вөйисны нюйтө.
Петны эз вермы. Арся ывлаыс вөлі
көдзыд. Пөльтө вой төв, буситіс. Лы-
сан, чаньлөн мамыс, гөрдліс, корис
отсөг.

Кызди отсавны Звездалы? Мый вөч-
ны? Миша котөртис конюшняю, босьтіс
вөжжи. Вөчис кытш, гаровтіс чань
кынөм увті, босьтчис кыскыны. Чань
ачыс отсасис жө. Ньөжйөникөн петіс
нюйта налькйысь. Сійө тіраліс, кын-
мис. Миша пөрччис курткасө да плав-
гис Звездалы мыш вылас.

Сійө кадсянныс Миша да Звезда өта-
мөдтөгыс оз вермыны овны. Кытчө
өтиыс, сэтчө и мөдыс.

Йөра

Миша Лудыков да Женя Козпуныров помалісны квайтөд класс. Гожомнас медасисны сиктса войтырлысь кук-мөссө видзны. Дерт, тайö абу нин сэтшөм сьöкыд удж, но век жö асывсяньыс рытөдз колö видзöдны сюрукъяс бöрся. Пöскöтинаыс сиктсянь верст кык сайын Эжөра вад дорын. Öтар бокас пипу рас, а мөдарас — пожöма яг. Рас шөрöдыс дзольгö-визувтö Öжын шор.

Пöльтіс лун тöv. Енэжöd кывтісны кымөръяс. Лун шөр бöрын ёртъяс вөтлісны сюрукъяссö шор дорö. Мөсьяс уськөдчисны юны ва. Юкталөм бöрын ёртъяс босьтчисны лыддыны мөсьясөс. Найö быд пөрйö вөчисны тадзи, медым некод эз вош.

— Мый нö тайö? Миян вöлі кызь нель мөс, а лыдди да лоис кызь вит, — шензис Женя.

Мишалөн арталөм бöрын кызь вит сюрук жö лоис.

— Кытысь нö бокөвöйыс? — шензис-

ны Женя да Миша. Но сюсьджыка видзөдөм бөрын казялісны, мый öти мөслөн ёна ыджыдджыкөсь сюръясыс.

— Да тайö жö йöра! — чуймис Миша.

Том пастукъяс дзевсисны пожөм сайö, виччысисны, мый лоö водзö. Вына зверь видзөдіс сюрукъяс вылө, а найö — сы вылө. Сэсся кузь кока заводитіс йирсыны. Сідзи и оліс лунтыр мөсьяскөд.

Воис кад мунны гортö.

— Гортö, гортö, донаяс! — горөдіс Миша. Тайö кывъяс бөрын мөсьяс веськөдчисны гортлань. Йöра синъяс-нас колльөдіс стадаөс, бөр пырис пипу раскө.

Турияс

Александр Александрович Турьевлөн семьяыс абу ыджыд: гозъя да кык пи. Колялы тулыснас дас куим тырис, а ичөтджыкыслы, Мишалы,— дас öти арөс.

Сан Саныч, тадзи Турьевос шулывлісны сиктын, шуис ветлыны вөрө да керавны пес. Көкъямыс час бөрын ая-пия пыжөн вуджисны мөдлапөлө. Со и Дзиб яг. Сись кодь пожомъясөс немжалиттөг чишкаләма-сотөма кольөм гожомся пөжар.

— Гажа вөлі ягыс. Уна и тшак да пув татысь вотлім, — висьталіс батыс Колялы да Мишалы.

Сан Саныч заведитіс «Дружба» пиласө да босьтчис уджө. Челядь радпырысь отсасисны. Лун шөр бөрын пилаыс виччысьтөг кусіс.

— Ме, час, видзөдла, мый лои, а ті, зонъяс, нюрсьыс өктыштөй зын турун, — тшөктіс батыс.

Кык вок мунісны нюрө. Яг дорын бурдөдчан туруныс быдмис омөля. Челядь мөдөдчисны шөрланьыс. Друг кыськө кыпөдчисны турияс да кутісны нораа горзыны. Но эз лэбны. Зонъяс воисны нюр вылын быдмысь коз дорө. Сэтысь аддзисны турияслысь позсө, көні куйліс турунвижов да сьөдов чутъяса куим кольк. Коля босьтіс өти кольк, көсйис петкөдлыны баты-

ыслы. Турияс казялісны челядьös да кутісны лэбавны дзик юр весьтöдныс. А сэссия öти тури нетшыштіс Мишалөн юрысь шапкасö... Кык вок повзисны да горöдісны батьсö.

Сан Саныч кыліс горзёмсö да öдйö локтіс пьян дорас. Медводз бөр пуктіс кольксö позъяс, а пьянсö велöдіс: некор пö эн вөрзьöдöй пöтка поз.

Крыса Миш да Турьев Гриш

Крыса Миш ичöтик тушаа, косі-ник, пытш кодь тэрыб. Кужö мудеритны, сьöкыд уджысь ичöтысяньыс öтдортчыліс. Öні вахтераліс совхозса мастерскöйын, лысь-öмсö эз чегъяв.

А Турьев Гриш дас нель арöссиянь вөлөн Гуа ягын кер кыскаліс. Батьыс фронт вылö усьліс да, ыджыд семьясö вердны коліс. Трактористö велöдчыліс да пыр на уджаліс совхозын. Прöст кадö сійö радейтліс ветлыны вөрö

кыйсыны-луйсыны. Зверь-пөткаос судзодны отсавліс Лыско понйыс.

Крыса Мишлөн вежыс петіс Турьев Гриш вылө. Горш, наян мортос эз радейтны грездса олысьяс. Сійос мыйлакө увтісны понъяс. Муртса петас туй вылө, тьявгөны нин. Овліс, и кокас кутчысьлісны. Өтчыд скөрмис Крыса-ыд и косыштіс беддён Лысколы юрас. Никсом бөрын пон пырис пос улө да кувсис.

Ёна жалитіс понсө Гриша, ылөсалис ёртыслысь олөмсө босьтөмөн Крыса вылө. Өти шойччан луно сійө нуөдіс Турьевос көч кыйны. Тэнад пө понйыд эм да мед кузь пеляясө котрөдлыштас.

Воисны раскө, но көчьясөс котрөдлөм пыдди понйыс Крыса Мишлөн пышйис гортас. Турьев и шуис:

— Тэнад, Миш, кокъясыд тэрыбөсь, вай жө көч трөпаөдыс котрав да увт менам Лыско моз. Садьмөдан көчьяссө, и найө кутасны мелань котөртны. Сэки ме найос и гымөда аслам пищальысь.

Крыса Миш сөгласитчис. Сійө дерт, эз сяммы увтны пон моз, но тьявгис

сьёлёмсяныс. Вöчис медводз кытш, пöсялöма, ньылöмыс визувтö чужöм кузяыс. А кöчьясыд абу йöйöсь: бура тöдöны понйыдлысь дуксö да гөлөссö. Öти эз вөрзы места вывсьыс.

— Тэ гораджыка увт, эз на садьмыны табъя кокъясыд,— ышöдiс Крыса Мишöс Турьев Гриш.

Дыр на, гашкö, увтiс да котралiс Гришалөн тшöктöм серти наян морт, но паныдасис накöд Коно Вась.

— Бура мөвпыштöма тэнö, яндысьтöм бугыльöс, понйыслысь ловсö босьтöмысь велöдны Турьевыд,— сералiг-тыр шуис сiйö.

Мöд луннас став грезд сёрнитiс Крыса Миш йылысь, кыдзи сiйö Турьев Гришлы кöч кыйны отсалöма.

Тэрыб

Я бара грездын овлiс-вылiс Тэрыб Митрей. Латшкöсiник тусаа, паськыд пельпомъяса, сьöд синъяса русыд юрсиа, чуклякодъ

кокъяса. Ичөтсянь муркөдчыліс му-
видз вылын, бөрынджык лэдзис сор-
товка, пуръясьліс да кылөдліс вөр.

Квайт арөссиянь велаліс лыддысь-
ны. Муртса вичмас прөст кад, пыр
и пуксяс книга сайө. Митрейлөн ёртъ-
ясыс кө сьом босьтөм бөрын ньөблісны
вина да табак, то сійө — бур книгаяс.
Лыддысьомнад Митрей унатор төдіс.

Важөн пуръястө кылөдлісны Кардо-
рөдз. Öнiя ногөн кө, Архангельскөдз.
Митрейөс, збой да удал мортөс, пөд-
радчикъяс радпырысь босьтлісны бри-
гадаө. Öтчыд бригада, көні вөлі Мит-
рей, лючки-ладнө сдایتіс пур Кардо-
рын. Гортөдз туйыд кузь. Öтияс сёр-
рытөдз картіөн швачкөны, мөдъяс теш
висьталөны, коймөдъяс закладысь
ворсөны.

Кодкө висьталөма Митрей йылысь
пароходса капитанлы. Сійө пө тэнад
чушкысь-пушкысь пароходсьыд дас
пөв тэрыб. Капитан абу эскөма. Дас
шайтысь заклад вартасны, мый Мит-
рей пановтас пароходсө. А сэки дас
шайтыд ыджыд сьом вөлі.

Митрей шуөма:

— Тані менö и чеччöдöй. Ябарö тiян пароходысь водзджык воа. Удита и пывсян ломтыны.

А сиктöдз верст сизимдас-кöкъямыс-дас на вöлöма.

Кор пароход матыстчас Ябара дорö, аддзасны кыр йылын сулалысь да кинас öвтчысь Митрейöс. Ломтысьö-тшынасьö, вöлöм, пывсян.

Висьталöны Митрей йылысь и со кутшöмтор. Мунасны сиктсаяс кутавны лудысь вöвъясöс. Регыдөн и сермö-даласны найöс. Оз шед сöмын Тшая кок. Некодöс ас дорас оз сибöд. Ков-мис шыасьны Митрей дорö.

— Ерöмакань, не татшöм вöвъясöс кутлывлі, — шуöма сійö, гораа шутөв-тöма да босьтöма котравны вöв бөрся-ыд. Сэтчöдз вöвтö котрöдлöма, мый сійö лигышмунöма да сувтöма.

Öнi кö оліс Митрей, эськö мирса чемпионөн вöлі.

Матрос Ёлик

Миян грездын овлома-вывлома Матрос Ёлик. Матрос нимсо сетломаось сы вoсна, мый батъыс служитлома флотын, вoвлoма матросoн. Ёликыд кужлома йoзлысь нум петкoдлыны, а корсюрo и пoръясъ-ыштны. Мыйкo висьталас — синваыд серамысла петo, а пoръялас — кок ув муыд вошлo.

Ќтчыд вoлoма апрель пом. Эжва вoсьoма нин. Пуксьoма Ыджыд лун — коми йoзлoн медся ыджыд праздник. Вичкоын абу на сывсьoма, но ывлаас сулалoмаось нин кызь сайo мужичoй, варовитoмаось олoм-вылoм йылысь. Кодсюрo ышoдo вoлoм ёртъ-яссo ва кузя кайлыны Серёговоo совла.

И вот сийo кадас вичко дортi муно вoлoм Ёликыд. Киас кoрзина, а мышку саяс нoптор. Кодкo казялома Ёлик-тo да горoдoма:

— Ёлик, лок, кежав миян дорo да пoръяв мыйкo Ыджыд лун кузя, оз ло грек.

— Некор меным, ог вевъяв, мөдысь коркө, — вочавидзөма сійө. — Навөлөкбөжө сов баржа сувтөдөмаось. Колө өдйөджык сэтчө котөртлыны да пудмөд-коймөд ньөбны.

Гызьөма мужичөй чукөр. Здук мысти Öликлөн кывъясыс чышкыштөмаось йөзсө вичко дорысь. Но кор войтыр воөмаось Навөлөкбөжө, сэн некутшөм сов баржа абу вөлөма.

— Но и кужис жө пөръявны миянөс талун трустыд Ыджыд лун кузя, — шуөма кодкө.

* * *

Миян пөляс шулөмаось: ваөн-йиөн кө пальөдас ойбырсө дзормөм Эжвалысь Ёгорей лун, то турун козьналас Микөла лун. Тайө воас дзык сідзи и лоис. Ёгорейөдз Эжва воссис. Тулыс мичаа пасьтөдіс видзьяс, расьяс, ставнас пармасө.

Петыр лунөдз на сиктса войтыр петісны пуктыны турун. Петыр лунөдз жө воис мырпом — гырысьяслөн и че-

лядълөн чөсмаянтор. Но оз быд во
өтмоза артмы тайө чөскыд вотөсыс.
Өти гожөмө уна вөраджык нюръясын,
мөд во — эрд вылынджык. Нывбабаяс
норасисны:

— Ыджыд нюрын таво мырпом тусь
абу. Кысь бара сюрыштас-а?

— Ме төда, көні артмөма таво чө-
скыд вотөсыд, — ошйысис Матрос
Өлик. — Но верма нуөдлыны сөмын
Петыр луно.

И со тайө луныс воис. Грездысь
чукөрмис дас кык нывбаба, ставныс-
лөн өти дум: чөсмасыны юмов вотөсөн.
Вит час асылын Өлик петіс накөд
туйө. Вуджисны Расаель, Пибъель.
Асылыс вөлі лөнь. Расъяс эз варо-
витны, а чөла виччысисны гожся лун
сувтөм. Ёна дөзмөдчисны номъяс.
Номъясысь эз кольчыны и лөдзъяс.

Мунісны верст вит кымын, а туй-
ыслөн помыс эз тыдав.

— Мыйкө дыр кутім мунны, —
шензъыны кутісны нывбабаяс.

— Регыд, регыд нин воам, шаньяс, —
вочавидзис Өлик.

Недыр мысти сійө петкөдіс вотөсла

мунысьясӧс вӧвлӧм делянка вылӧ. Гӧ-
гӧр вӧліны мыръяс.

— Со и воим, сьӧлӧм нормӧдысьяс,
гырысь мырпома местаӧ, ӧктысьӧй,—
сералігтыр шуис Ӧлик да пышйис
расӧ, быттӧ му пырыс муніс. Ёна
и скӧралісны нывбабаяс, мисьтӧм
кывъясӧн видісны Матрос Ӧликӧс.

— Ме жӧ шулі, грек Петыр лун
кузяыд вотчынытӧ. Бурджык вӧлі,
Петыр праведнӧйыслы кӧ пернапасъяс
чӧвтім вичкоын,— шуис олӧмакодъ
нин ичмонь.

Юриндалысь

Гөрд сатин дөрөм	3
Йөнөд йөрын	17
Хромка	21
Мамлы козин	24
Омоль	26
Выйов	29
Звезда	32
Йөра	34
Турияс	35
Крыса Миш да Турьев Гриш	37
Тэрыб	39
Матрос Öлик	42

Некрасов (Гамса) А. И.

Н 48 Гөрд сатин дөрөм: Висьтъяс.— Сыктывкар: Коми
книжнӧй издательство, 1995.—48 л. б.

ISBN 5-7555-0545-4

Александр Некрасов (Гамса) нэмсӧ велӧдӧс школаын, бура
тӧдӧ челядьӧс да кужӧмӧн восьтӧ нальсь олӧм кылӧмсӧ аслас
ичӧтик висьтъясын. Автор сӧдзжӧ мичаа серпасалӧ чужан мусӧ
да аддзӧ пӧсь кывъяс тани ольсь войтырлы.

Н $\frac{4803310100-013}{M 128 (03)-95}$ 17—95 м

84. 2 Рос-Коми

*Для детей младшего
школьного возраста*

**Литературно-художественное изда-
ние**

Александр Иванович НЕКРАСОВ (Гамса)

КРАСНАЯ РУБАШКА


Рассказы на коми языке

Редактор *А. В. Тентюков*. Художник *А. М. Гаранин*.
Художественный редактор *В. Б. Осипов*. Технический
редактор *А. Н. Вишнева*. Корректор *Е. С. Панюкова*.

ЛР № 010039

Сдано в набор 28.03.95. Подписано к печати 3.05.95.
Формат 60×84¹/₁₆. Бумага № 2. Гарнитура «Школьная».
Печать офсетная. Усл. печ. л. 2,79. Усл. кр.-отт.
6,05. Уч.-изд. л. 1,0. Тираж 2000. Заказ № 1380. Коми
книжное издательство. 167610, г. Сыктывкар, ул. К. Мар-
кса, 229.

АО «Коми республиканская типография». 167610, г. Сык-
тывкар, ул. Первомайская, 70.



КОМИ КНИЖНОЙ
ИЗДАТЕЛЬСТВО
1995